

# तीतसला पावलकी टिवु यिकी

## दी थेपकी कोर्ला

दी यिकी ति पावलकी तीतसला टिवु यिन। तीतस ति यहूदी मिन्दुप मिरिक यम्बा नेसुर ख्रीष्टियान च्युङ्गुप मी यिन। ती ति पावल सुड ख्याप्टाक कितुप पेला पावलला दाल्जा किटे कितुप मी नाज्युड यिनोक। पावलकी तीला चर्चकी लाकातिवा ल्हटे कितुपला क्रेटला राड ज्याक्नोक। दी यिकीला खक्छ्येवु ताम्डे सुमतिवा हाक्कोकिवी।

ताम्डे च्यिक ति माङ्शोक क्रेटकी मीतिवा दुक्टा वोतुप तप्की पावलकी तीतसला चर्चकी गोमा कितुपतिवा चुका किताड नालु वुड गोकिवी सिरुप कोर्ला टेन्सो लोङ्गिगी। ताम्डे ड्यिवा ति पावलकी तीतसला चर्चला वोतुप छोकपातिवा ताड गावागुवा ताड आमपुमतिवा ताड ज्येन्दातिवा ताड योक्पुतिवाला येन्देन लोप सिनी पेताड बिन वे। तेरी सिनाड तिङ्गला पावलकी तीतसला कुसु ज्यम्बु ताड थिर्मु वुड गोकिवी, तमा ख्रीष्टियान किताड नालुला दे गोकिवी, यिने डला डोप, थमु ग्यकुप, चर्चला ख्ये पेतेप नेसुर कुतुक दे गोकी सिनी पेताड बिन वे।

## मुला राड वोतुप लोप्च्येनतिवा

- यिकीकी कोर्ला १:१-४
- चर्चकी छ्येतिवी कोर्ला १:५-१६
- चर्चकी छोकपा नम्बा कुतुककी कि गोवु लाका २:१-१५
- च्याङ्से देतुपकी कोर्ला पेताड ३:१-११
- सिन्दा क्यावु ३:१२-१५

## पावलकी टसी देलेक

१ दी यिकी ति कोन्छ्योककी लावा ताड चोवो येशूकी लोमा छ्ये ड पावलकी तङ्गुप यिन। कोन्छ्योककी पेतुपतिवाला टेड्बुला तेपा कि ज्यितुप ताड खोकी रिक्पा वोतुप सुड ति ल्यामु क्यानी हाक्को ज्यितुपला कोन्छ्योककी डला लोमा छ्ये जो नाड्सुड। २ तुक क्यानी तिवा ति नाम्साड मिशिवु मिजी ड्येतुपला रेन्नी देन वे। ती मिजी ति जिनोक जो मनङ्गुप कोन्छ्योककी थल्मा नेज्युनी थाक्छ्येन नङ्गुप यिन। ३ दाक्पुला ती थाक्छ्येन नङ्गुप सुड ति खोरे पेतुप तुजेला छ्या तेन नाड्सुड। तन्दा साड ती सुड ख्याप्टाक कितुपला दिक्पा ने थर ज्यितुप कोन्छ्योककी डला चेक तेसुड। ४ येशू ख्रीष्टला तेपा कितुप च्यिक राड वोतुप डे आड तीतसला दी यिकी टिवु यिनो।

पपा कोन्छ्योक ताड दाक्पुला दिक्पा ने थर ज्यितुप येशू ख्रीष्टकी कटिन ताड लोदिमु ख्युरुडला नङ्शी।

## क्रेटला तीतसकी लाकातिवा

५ डे ख्युरुडला क्रेटला क्युर्नी ज्यकुप तेन्दोक ति ख्योरो क्यानी मासिन्दुप लाकातिवा कितुपला ताड डे ख्युरुडला योक कुतुप दोके ग्येसा ग्येसाला गोमा कितुप मी छ्ये बेतुपला यिन। ६ गोमा कितुपला पेतुप मी छ्ये ति मीतिवी पर्ला लाका

मेलोक्पा माक्यानी क्येन मेतुप वुड गोकिवी। तीकी ति पेर्मी च्यिक राड वोतुप ताड तीकी पेजातिवा साड तेपा कितुप ताड च्योलाम ल्यामु वोतुप ताड पपाआमी खला ड्येन्दुप वुड गोकिवी। ७ च्यिलासिसिन गोमा कितुप मी छ्ये ति कोन्छ्योककी लाका कितुप मी यिन्दुप तप्की क्येन मेतुप वुड गोकिवी। ती ति हम्बा मिक्वि वुड गोकिवी। ती ति हम्बा मिक्वि ताड शाक्येक ड्यिर्मु मिक्वि ताड छ्याङ्गले मेतुप ताड खाँदा मिक्वि ताड टोड्बाला देर्पा कितुप वुङ्गुप मेवी। ८ यिने डेन्बुला ल्यामु कितुप ताड ड्यिङ्ज्ये च्यङ्च्यु वोतुप ताड खुरुडला डेकला देतुप ताड टेड्बु वोतुप ताड चाड्मा वोतुप ताड हम क्यानी देतुप ताड ९ खोरो लापुप सुड टेड्बुला रम्बु क्यानी युक् गोकिवी। तुक क्यासिन तीकी सुड टेड्बुला लापुप दोके येन्देन तेर थुष्किवी। तमा सुड टेड्बुकी तेन्दोकला लङ्गुपतिवाला टेड्बु काड यिन सिरुप ति लोप साड थुष्किवी।

१० च्यिलासिसिन क्रेटला वोतुप माङ्शोक मीतिवा ति ओडला मेदेबु, मी यम्बाला मेतुप ताड जिनोक जोप लाका किवी। तिवा ति माङ्शोक यहूदी च्येतुप लुक्सु क्यावु मीतिवी नाङ्ला ख्येल्गिवी। ११ तिवाला ख चुम्नी दे ज्यि गोकिवी, च्यिलासिसिन तिवा रङ्गी ख्येप्साडकी थोक्ला तेरुप मेङ्गुप येन्देन लाप्नी तेरी मिछाडतिवी पर्ला मेलोक्पा जेवी। १२ तिवी पर नेमा

क्रेटकी लुङ्तेम्बा मिरा च्यिककी दुक सिनी सिक्का वे, “क्रेटला देतुप मीतिवा ति नरी जिनोकपा ताड सेम्ज्येन दुक्टा ताड छेशिक्पा गिवी।” १३दी ताम्डे ति टेड्बु यिन। तुक क्यानी तिवाला कशेन वोरु तेन! तमा तिवी तेपा ति रम्बु च्युङ्शी। १४तमा यहूदीतिवी जोवु फेन मोथोवु पे ताड ताम्डे मेटेड्बु कितुप मीतिवी योक कुतुप ताम्डेला तिवा ड्याम मिक्की। १५मी टेड्बुतिवाला ताम्डे तेरी टेड्बु राड गिवी, यिने मी मेटेड्बु ताड तेपा मिक्किवुतिवाला ति तेरी ताम्डे मेटेड्बु तिराड गिवी। तिवी सेम ताड नासाम साड मेलोकपा गिवी। १६तिवा कोन्छ्योकला डो शेकिवी सिनी सिरुप याड सिवी, यिने रडगी किताड नेसुर खोला मारे तोड्गिवी। तिवा दुक्टा ताड खोकी सुडला मेड्येन्दुप गिवी। तमा काड साड लाका टेड्बु कि छ्योवु मेड्गिवी।

### मी कुतुक कुतुकला येन्देन

२ यिने तीतस ख्युरुड ति येन्देन टेड्बु तिराड लोप। २मी गावातिवाला कुसुमी देतुप ताड ताड्देन कि छ्योवु ताड खुरुडला डेकला ज्योक थुपुप जो। तमा तिवाला तेपा रम्बु ताड डियङ्ज्ये कितुप ताड हम क्यानी दे थुपुप वुड गोकिवी सिनी लोप। ३तुक राड क्यानी मी गामातिवा किताड नालु ति टेड्बु वोतुप ताड मी यम्बी कोर्ला ताम्डे मेलोवा मिक्किवु ताड छ्याङ्गेले मेतुप ताड चुका

ति ल्यामु नोके तिराड लोप्शी ४तुक राड क्यानी मी गामातिवी पुम्पेजा ज्येन्दातिवाला दाक दाक्पी ख्योवा ताड पेजातिवाला डियङ्ज्ये कितुप ताड ५खुरुडला डेकला ज्योकुप ताड खोरो ख्योवी मुला टेड्बु वोतुप ताड खाड्बा शिड ल्यामो क्यानी ल्हाप ताड च्यङ्च्यु सेम्बा वोतुप ताड रडगी ख्योवी ओडला दे गोकिवी सिनी लोप्शी। तुक क्यासिन कोन्छ्योककी सुडला मी यम्बी मारे मोतोड्शी। ६तुक राड क्यानी ख्योकपेजा ज्येन्दातिवाला साड डेकला दे सिनी टोड्गु बिन। ७तमा ख्युरुड लाका तेरीला टेड्बु क्यानी ख्योरो मिजी ति यम्बाला छ्या तेन। ख्योरो लोपुप येन्देन ति टेड्बु ताड ताड्देन वोतुप ताड ८क्येन मेतुप वुड्शी। तमा मी साड ख्योरो ताम्डेला मारे तोड् मुथुप्शी। तुक क्यानी डियरा तेन्दोकला लावुतिवी डियरा कोर्ला सिरुप ताम्डे काड साड माड्येनी डोछाला ख्येल्शी।

९योकपुतिवा साड दाक दाक्पी ज्यिन्दाककी ओङ्ज्येनला देनी ज्यिन्दाकला गा लङ्गुप ताड ख मग्यकुप वुड गोकिवी सिनी लोप। १०तिवा कुन कितुप मेड्शी, यिने तेपा कि छ्योवु वुड्शी। तुक क्यासिन तिवी तेरी ताम्डेला दाकपुला दिक्पा ने थर ज्यितुप कोन्छ्योककी कोर्ला लापुप सुड ति टेड्बु नोक सिनी हाक्कोकिवी।

११च्यिलासिसिन कोन्छ्योककी तेरी मीतिवाला दिक्पा ने थर ज्यितुपला

कटिन नड वे। १२ती कटिनकी राड दाक्पु ति कोन्छ्योकला गा मलङ्गुप लाका ताड तेपा मिकिवु मीतिवी दोके जम्बुलिङकी च्यालकतिवाला ड्यिङ्ज्ये कितुप क्युर्नी दी जम्बुलिङला देतुप पेला खुरुङला डेकला ज्योकुप ताड टेङ्बु वोतुप कोन्छ्योकला गा लङ्गुप मिजी क्योङ्गुपला येन्देन नडिगवी। १३ती तप्की चोछ्येवु कोन्छ्योक ताड दिक्पा ने थर ज्यितुप चोवो येशू ख्रीष्ट फेपुप मोवाकी थोक्ला दाक्पु रेवा क्यानी गुनी देकिवी। १४ती ख्रीष्टकी राड दाक्पुला रङ्गी तेरी दुक्टातिवा नेसुर थर ज्यितुपला खोरे मिजी साड दाक्पी थोक्ला नाङ्सुड। तमा लाका ल्यामु कितुप खक्छ्येवु मिरिक जोपला सेम टेङ्बु जो नाङ्सुड। १५तुक क्यानी ख्युरुङ दी तेरी ताम्डेतिवा मीतिवाला येन्देन बिन, ओङ्ज्येन ताड मुला टोङ्गु बिन्नी वोरु तेन। तमा सी साड ख्युरुङला ड्यिङ्मर मिकिशी।

### चुका ति टेङ्बु नोके तिराड की

३ ओङ्ज्येन कितुपतिवा ताड मी छ्येतिवी ओङला देनी तिवी खला ड्येन्दुप ताड लाका टेङ्बु कितुपला नाम्साड तिड माछे सिनी मीतिवाला टोङ्गु बिन। २तमा तिवा सी तेन्दोकला साड मालङ्गी, खाँदा मिकिशी, सेम बोल्लु ताड मी तेरीकी मुला कुसु ज्यम्बु वुङ गोकिवी सिनी तिवाला टेन्सो कि च्यी।

३च्यिलासिसिन येशूला तेपा कितुप गोमाला ड्यिराड साड हम्बा कितुप ताड अम्बारङ्गिङ कितुप ताड थङ्गी कितुप ताड शम्डेन कितुप ताड किर्मु तिराड छोलुप ताड ठतोक कितुप ताड मीतिवी ड्यिङ्मर क्यावु ताड च्यिककी च्यिकला ड्यिङ्मर कितुप वोतुप्जा। ४यिने दिक्पा ने थर ज्यितुप कोन्छ्योककी कटिनकी जोसालेन्सिन ५दाक्पुला थर च्यिसुड। ती ति दाक्पी लाका टेङ्बु क्यावु तप्की मिन, खोला च्यम्बा वोतुप तप्की यिन। खोकी दाक्पुला चाङ्मा जोनी मिजी सम्बा नङ्गुप ताड खोकी थु चाङ्मा नेसुर दाक्पुला सम्बा फोनी थर च्यितुप यिन। ६ती थु चाङ्मा ति खोकी दिक्पा ने थर ज्यितुप येशू ख्रीष्ट नेसुर दाक्पुला ग्यक्चे क्यानी नाङ्सुड। ७तुक क्यानी खोकी कटिनकी दाक्पु टेङ्बु च्युङ्नी दाक्पुला नाम्साड मिसिवु मिजी थोप छ्योवु रेवा नाङ्सुड। ८दी ताम्डे ति टेङ्बु यिन, ख्यिराड दी ताम्डेला डार की सिनी ड नो कितिन। तुक क्यानी सी कोन्छ्योकला तेपा किवे, तिवी लाका ल्यामु कितुपला ड्याम्ले किशी। तुक कितुप ति मीतिवी थोक्ला छासे ल्यामु ताड ख्येप्साड वोतुप यिन। ९यिने ताम्डे अम्बारङ्गिङ कितुप ताड गिपाकी कोर्ला फेन मोथोवु ताम्डे कितुप ताड खाँदा कितुप ताड ठिमकी कोर्ला थमु ग्यकुपतिवी नेसुर क्योक्से की, च्यिलासिसिन दी ताम्डेतिवा ति ख्येप्साड मेतुप ताड तेर्मे यिन। १०ख्ये

बेतुप मीला ति थेङ्गमा च्यिक चोयी  
 ड्यी चोयी टोङ्गु बिन, तमा तीकी  
 मुला काड साड लिङ्गु तेङ्गु माकी।  
 ११ती मी ति दुक्टा ताड दिक्छेन  
 यिन्दुप ति हाक्कोवा की। तमा ती ति  
 खुरुड राड क्येन फोकिवी।

### तिङ्मी टोङ्गु

१२अर्तिमास ताड तुखिकसला ख्योरो  
 ते तोङ्गुप पेला ख्युरुड निकोपोलिसला  
 डे ते यिन्ज्यिक मिन्ज्यिक शोक।  
 च्यिलासिसिन ड गुन्बी ल ति तेराड  
 देतुप सिनी नासाम तङ्गियन। १३वकील

जेनास ताड अपोल्लोस फार छुर  
 कोरा ग्यकुप पेला ल्यामो क्यानी  
 दाल्जा किसा! तिवाला काड साड  
 ड्युङ्मु मेङ्शी। १४दाक्पी मीतिवी नरी  
 लाका ल्यामु किशी, तमा कतुकारला  
 ख्येलुपतिवाला दाल्जा कि थुप्नी  
 डोछाला मेख्येल्शी। १५ड ताड मुला  
 वोतुपतिवा तेरीकी ख्यिराडला टसी  
 देलेक सिक्या वोतो। कोन्छ्योकला  
 तेपा क्यानी ड्यिराडला ड्यिङ्ज्ये  
 कितुपतिवाला साड टसी देलेक  
 सिनी लोपा। कोन्छ्योककी कटिन ति  
 ख्यिराड तेरीला वुङ्गिता।

